


U ovom broju, između ostalog, čitajte:

- **UPFBiH predstavilo aktivnosti koje imaju za cilj unapređenje poslovanja i bolji životni standard građana**
- **Udruženje uputilo urgenciju u vezi tumačenja Uredbe o pomoći stanovništvu uslijed rasta indeksa potrošačkih cijena**
- **Održana sjednica UO UPFBiH**
- **Predstavnici UPFBiH i sindikata o jačanju saradnje po pitanjima standarda radnika**
- **Održan sastanak o aktivnostima na zbrinjavanju otpada animalnog porijekla iz maloprodajnih lanaca**
- **Održana sjednica UO UPKS i tematska sjednica "Ljudski resursi - kočnica razvoja Kantona Sarajevo"**





UPFBiH predstavilo aktivnosti koje imaju za cilj unapređenje poslovanja i bolji životni standard građana

Novi direktor Mario Nenadić najavio intenzivne aktivnosti UPFBiH na stvaranju povoljnijih uvjeta za rast konkurentne sposobnosti domaće privrede i povećanje životnog standarda građana

Smanjenje opterećenja cijene rada u cilju povećanja plaća, ukidanje i smanjenje parafiskalnih nameta, smanjenje broja dana obaveza naknade plaće za vrijeme bolovanja koja pada na teret poslodavca sa 42 dana na 15 dana kroz izmjenu Zakona o zdravstvenom osiguranju, liberalizacija uvoza radne snage te poboljšanje poslovnog ambijenta u cjelini, ključne su aktivnosti Udruženja poslodavaca Federacije Bosne i Hercegovine u narednom periodu.

Ove aktivnosti UPFBiH imaju za cilj stvaranje uslova za povećanje plaća, životnog standarda građana, konkurentnosti privrede FBiH, budžetskih i vanbudžetskih prihoda, smanjenje sive ekonomije i rada na crno. Ovo je rečeno na druženju predstavnika poslovne zajednice sa predstavnicima bh. medija, održanog s ciljem predstavljanja aktivnosti UPFBiH, poboljšanju saradnje i predstavljanju novog direktora UPFBiH.



"Smanjenjem opterećenja cijene rada sa postojećih 41,5 na nivo ispod 30 posto, stvaraju se mogućnosti za povećanje plaća od deset do 15 posto. Ukidanjem određenih i smanjenjem

nekim drugim parafiskalnih nameta stvaraju se nove mogućnosti za povećanje plaća. Također, smanjenje broja dana bolovanja na teret poslodavca sa postojećih 42 na 15 omogućilo bi povećanje plaća za 15 posto" kazao je predsjednik UPFBiH Adnan Smailbegović.

UPFBiH će aktivno raditi na liberalizaciji uvoza radne snage u BiH. Podsjetio je da je UPFBiH pripremio set izmjena i dopuna postojećih i donošenja novih zakona koji imaju za cilj rasterećenje privrede i poboljšanje poslovnog ambijenta. Ovi zakoni se odnose na rad i zapošljavanje, privredu, javne prihode i zdravstvo.

Novi direktor UPFBiH Mario Nenadić u prvom razgovoru sa predstavnicima medija najavio je intenzivne aktivnosti UPFBiH na stvaranju povoljnijih uvjeta za rast konkurentske sposobnosti domaće privrede i povećanje životnog standarda građana. UPFBiH je trenutno aktivno uključeno u pregovore sa granskim sindikatima oko potpisivanja novih kolektivnih ugovora.

"Nastavit ćemo naše aktivnosti na pojednostavljenju, ubrzanju i višem stepenu transparentnosti kompliciranih administrativnih procedura. Ostajemo opredjeljeni da sve naše aktivnosti koordiniramo sa socijalnim partnerima, sindikatima i vladom", naglasio je Nenadić.



U narednom periodu operativnim radom će početi Poslovno-obrazovni centar UPFBiH. U saradnji sa vodećim bh. stručnjacima iz različitih oblasti radimo na uspostavljanju think tankova, čije analize i ekspertize će doprinosti kvalitetnijem radu UPFBiH.

U narednoj godini UPFBiH će organizirati dodjelu nagrade "Emerik Blum" za najboljeg poslodavca u FBiH.

Predstavnici UPFBiH su naglasili ključnu ulogu medija u kreiranju povoljnijeg poslovnog ambijenta i zahvalili su se predstavnicima medija za dugogodišnju uspješnu saradnju i predstavljanju aktivnosti UPFBiH.

UPFBiH je organiziralo predstavljanje svojih aktivnosti u okviru Projekta "Doprinos organizacija civilnog društva poboljšanju utjecaja poduzetništva na socio-ekonomski razvoj BiH" koji finansira Europska unija.

UPFBiH uputilo urgenciju u vezi tumačenja Uredbe o pomoći stanovništvu uslijed rasta indeksa potrošačkih cijena

UPFBiH se nakon stupanja Uredbe na snagu, javlja sve veći broj članica sa upitom da li se jednokratna pomoć može isplatiti u više rata



Udruženje poslodavaca FBiH uputilo je premijeru Vlade FBiH Fadilu Novaliću i zamjenicima premijera Jelki Milićević i Vesku Drljači urgenciju za tumačenje člana 19. Uredbe o pomoći stanovništvu uslijed rasta indeksa potrošačkih cijena, a koje je zatraženo 27. jula 2022. godine. Zatraženo je tumačenje pomenutog člana u smislu da li se jednokratna pomoć koja je propisana Uredbom može isplatiti u više rata.

Naime, Udruženju poslodavaca FBiH se nakon stupanja Uredbe na snagu, javlja sve veći broj članica sa upitom da li se jednokratna pomoć može isplatiti u više rata.

Usmeni stavovi Porezne uprave FBiH su da nema smetnji za obročnu isplatu, jer veći broj firmi, posebno kompanija sa više uposlenih, nije u mogućnosti da jednokratno isplati ukupan iznos iz preporuke Vlade FBiH, jer bi time bila ugrožena likvidnost i izmirivanje drugih novčanih obaveza, ali postoji interes od strane poslodavaca da se do kraja godine iznos isplati u više rata, što Udruženje smatra opravdanim i od interesa i za Vladu FBiH i za radnike i poslodavce.

Održana sjednica UO Udruženja poslodavaca FBiH

Utvrđen datum održavanja XIX redovne izborne Skupštine UPFBiH



Na sjednici Upravnog odbora Udruženja poslodavaca Federacije Bosne i Hercegovine, održanoj 31. augusta 2022. godine, članovi su utvrdili datum održava XIX redovne izborne Skupštine Udruženja poslodavaca FBiH. Zaključeno je da će se Skupština Udruženja održati 22. septembra 2022. godine, a prihvaćen je i prijedlog Dnevnog reda Skupštine.

U nastavku sjednice imenovani su pregovarački timovi Udruženja poslodavaca FBiH za vođenje i zaključivanje kolektivnih ugovora za djelatnost metalne industrije, djelatnost tekstilne industrije i industrije kože, gume i obuće, djelatnost prerade drveta i papira, djelatnost hemije i nemetala, te za djelatnost građevinarstva. Pregovarački timovi će voditi pregovore i zaključivati kolektivne ugovor za navedene djelatnosti sa reprezentativnim granskim sindikatima.

Članovi su donijeli odluku o razrješenju i imenovanju novog predstavnika Udruženja poslodavaca u FBiH u Odbor Agencije za javne nabavke. Za novog člana u Odboru ove agencije ispred Udruženja poslodavaca FBiH imenovan je direktor UPFBiH Mario Nenadić, a Mladen Pandurević razriješen dužnosti člana u Odboru zbog isteka mandata direktora u Udruženju poslodavaca FBiH.

Također, donesena je odluka o imenovanju predstavnika UPFBiH u projekat UN Women "Žene poduzetnice u BiH".

Pod tačkom razno, predsjednik UPFBiH Adnan Smailbegović, obavijestio je članove da je Ministarstvo razvoja, poduzetništva i obrta Federacije BiH uputilo zahtjev za imenovanje predstavnika u tematske grupe za izradu Strategije razvoja male privrede FBiH za period 2022.-2027. godinu. S tim u vezi,



zaključeno je da se u tematsku grupu -poduzetnička infrastruktura imenuje Suad Ećo, tematsku grupu - inovacije, digitalizacije i zelena tranzicija imenuje Jakub Čehić, tematsku grupu - poslovno okruženje imenuje Mario Nenadić, tematsku grupu - ciljani oblici poduzetništva imenuje Vjekoslav Domljan, te u tematsku grupu - obrti i srodne djelatnosti imenuje Igor Baroš. Članovi tematskih grupa će biti angažovani na definiranju i diskutiranju o stanju oblasti za koju su formirane, potvrđivanju akceleratora i prepreka razvoja, fokusiranju pravca razvoja, definiranju vizije razvoja male privrede, strateških ciljeva, prioriteta i strateških projekata.



Pod tekućim pitanjima raspravljalo se i o liberalizaciji uvoza radne snage u FBiH. Članovi su istakli da je potrebno liberalizovati uvoz jer jposlodavci sve teže dolaze do radnika. Naglašeno je da ste nezaposlenih zavoda za zapošljavanje nisu mjerodavne jer u praksi većina osoba sa tih lista nisu

aktivni tražioci posla, te da je neophodno napraviti uvid u stvarno stanje tržišta, kako bi se riješio problem deficita radne snage.

Održan sastanak o aktivnostima na zbrinjavanju otpada animalnog porijekla iz maloprodajnih lanaca u Federaciji BiH

Sastanak je održan s ciljem rješavanja pitanja odlaganja povrata animalnog otpada i postupanja nadležne federalne inspekcije



Na inicijativu Udruženja poslodavaca Federacije Bosne i Hercegovine, ministar poljoprivrede, vodoprivrede i šumarstva FBiH Šemsudin Dedić 29. augusta 2022. godine upriličio je sastanak na temu zbrinjavanja otpada animalnog porijekla iz maloprodajnih lanaca i potrebi zaštite potrošača i građana Federacije BiH.

Sastanku su prisustvovali federalna ministrica turizma i okoliša Edita Đapo, direktor Federalne uprave za inspekcijske poslove Anis Ajdinović, predsjednik Udruženja poslodavaca FBiH Adnan Smailbegović, direktor Udruženja poslodavaca Federacije BiH Mario Nenadić, glavni Federalni veterinarski inspektor Nermin Smajlagić te predsjednik Uprave Konzuma i Mercatora Nihad Imširović.

Sastanak je održan s ciljem rješavanja pitanja odlaganja povrata animalnog otpada i postupanja nadležne federalne inspekcije, zaštite okoliša i drugih pitanja u vezi sa ovim problemom.

Predstavnici Udruženja poslodavaca FBiH su predstavili problem koji je eskalirao nakon promjena u postupanju nadležnih vlasti i inspekcija što je u konačnici "zbunilo" i dovelo u neizvjesnu situaciju veletrgovce i dobavljače, ali i inspekcije i druge institucije u lancu postupanja.

Udruženje zahvaljuje ministru poljoprivrede, vodoprivrede i šumarstva Federacije BiH i njegovim saradnicima, ministrici okoliša i turizma i direktoru Federalne uprave za inspekcijske poslove na iznalasku praktičkih rješenja s ciljem prevazilaženja i mogućeg eskaliranja problema. S tim u vezi, Ministarstvo poljoprivrede, vodoprivrede i šumarstva Federacije BiH je Federalnom ministarstvu okoliša i turizma, nadležnim kantonalnim ministarstvima za pitanja veterinarstva i zaštite okoliša i Federalnoj upravi za inspekcijske poslove dostavilo postupanje u vezi sa zbrinjavanjem nusproizvoda životinjskog porijekla, kao i kreirani obrazac koji je sastavni dio dopisa.

Udruženje poslodavaca FBiH obavještava i ovim putem zainteresirana privredna društva, posebno članice, o predmetnim aktivnostima i poziva da nas obavijeste o provedbi navedenih "instrukcija" resornog ministarstva u Vladi FBiH. Istovremeno vas obavještavamo da je Ministarstvo pokrenulo



aktivnosti na štampanju obrasca za provedbu ovih mjera koje će vam biti dostupne. Paralelno, Udruženje će voditi aktivnosti sa nadležnim institucijama s ciljem da se ova roba i proizvodi isključe iz sistema PDV-a.

Sastanak predstavnika UPFBiH i Sindikata tekstila, kože, obuće i gume FBiH o KU za djelatnost tekstilne, kožarsko-prerađivačke, gumarske i industrije obuće

Dogovoreno formiranje pregovaračkih timova



Predstavnici Udruženja poslodavaca Federacije Bosne i Hercegovine i Sindikata tekstila, kože, obuće i gume Federacije BiH održali su 16. augusta 2022. godine sastanak s ciljem ponovnog pokretanja pregovora za potpisivanje Kolektivnog ugovora za djelatnost tekstilne, kožarsko-prerađivačke, gumarske i industrije obuće.

Na sastanku su razmatrana pitanja koja su bila sporna u prethodnim pregovorima te je zaključeno da će nadležni organi ove dvije institucije u narednom periodu formirati pregovaračke timove i zvanično započeti pregovore.

UPFBiH i FIA o produbljanju saradnje



Dosadašnja saradnja Udruženja poslodavaca FBiH i FIA-e, unapređenje aktivnosti te razmatranje mogućnosti da UPFBiH bez naknade, u svrhu vršenja analiza od općedruštvene koristi, koristi podatke FIA-e, bile su teme sastanka direktora UPFBiH Maria Nenadića i direktorice FIA-e Irme Borovac. Sastanak je održan 10. augusta, a prisustvovali su mu i zamjenik direktora FIA-e Tomislav Leko, šefica Sektora za ekonomsko-finansijske poslove FIA-e Jasna Skalonjić, te sekretar UPFBiH Mersiha Jusić i savjetnik predsjednika UO UPFBiH Mladen Pandurević.

Naglašeno je da su ove dvije institucije ranije sarađivale na izradi Zakona o jedinstvenom sistemu za multilateralne kompenzacije i cesije u kojem je predloženo da organizator bude Finansijsko-informatička agencija. Napomenuto je da je neophodno razviti odgovarajući softver, odnosno elektronsku platformu na kojoj bi privredni subjekti mogli registrovati svoja dugovanja i potraživanja.

Također, saradnja se odvijala i kroz rad na pripremi Nacrta Zakona o registraciji poslovnih subjekata u FBiH. Kroz ovaj zakon predloženo je da se registracija poslovnih subjekata prenese sa sudova na FIA-u. FIA je to načelno podržala i dala svoje sugestije kod izrade Zakona koji je pripremila Udruženje poslodavaca u FBiH.

Predstavnici UPFBiH kazali su da je Udruženje implementiralo projekat "Poslovanje bez korupcije" koji ima za cilj doprinijeti smanjenju prostora za koruptivne radnje nosilaca izvršne i zakonodavne vlasti, kao i izloženosti poslodavaca korupciji kroz, između ostalog, iniciranje

izmjene postojeće legislative koja potiče korupciju, uspostavu javnih registara. Kroz projekat je, u saradnji sa Agencijom, planirana uspostava Centralnog registra grantova, poticaja i povoljnih kredita i Centralnog registra vlasnika kapitala.

Zaključeno je da će se i dalje jačati saradnja između institucija te da će zajednički raditi na inicijativama izmjena navedenih zakona. UPFBiH i FIA će u narednom periodu raditi na pokretanju inicijative za izmjenu Zakona o registraciji poslovnih subjekata sa ciljem da se registracija poslovnih subjekata sa sudova prenese na FIA-u, a što je u obostranom interesu te u interesu cjelokupne društvene zajednice.

Predstavnici UPFBiH i sindikata o jačanju saradnje po pitanjima standarda radnika



Rukovodstvo Udruženja poslodavaca FBiH, predsjednik Adnan Smailbegović i direktor Mario Nenadić, održali su sastanak sa predsjednikom Saveza samostalnih sindikata BiH Mevludinom Bektićem, predsjednicom Samostalnog sindikata radnika hemije i metala FBiH Ilvanom Smajlović i predsjednikom Nezavisnog strukovnog sindikata radnika u zdravstvu FBiH Zijadom Latifovićem.

Sastanku je prisustvovala i sekretar Udruženja Mersiha Jusić, a održan je s ciljem jačanja saradnje po pitanjima standarda radnika i mjerama za unapređenje tog stanja. Dogovoreno je da će se u narednom periodu održati tripartitne konsultacije o ovim i drugim pitanjima.

Održana sjednica UO UPKS i tematska sjednica "Ljudski resursi - kočnica razvoja Kantona Sarajevo"



Na sjednici Upravnog odbora Udruženja poslodavaca Kantona Sarajevo, održanoj 31. augusta 2022. godine, članovi su usvojili Odluku o utvrđivanju datuma i mjesta Skupštine, kao i Odluku o utvrđivanju dnevnog reda Skupštine. Zaključeno je da će se Skupština održati 09. septembra 2022. godine.

Nakon sjednice Upravnog odbora, održana je i tematska sjednica "Ljudski resursi - kočnica razvoja Kantona Sarajevo". Članovi su istakli da su ljudski kadrovi potencijal bez kojeg nema poslovnih aktivnosti i da poslodavci imaju potrebu za kvalitetnim kadrovima, ali da također imaju problem sa osiguranjem kadrova. Izneseni su podaci da se na birou trenutno nalazi više od 56.000 nezaposlenih, te je postavljeno pitanje kako i pored tolikog broja, poslodavcima nedostaje kadrova te koja je uloga službi za zapošljavanje, da li da djeluju kao posrednici u zapošljavanju ili socijalne ustanove. Da bi se riješio ovaj problem, potrebno je po hitnom postupku donijeti Zakon o posredovanju u zapošljavanju, svima koji nisu aktivni tražioci posla ukinuti benefite koje nude službe za zapošljavanje te obezbijediti prekvalifikaciju kao model za smanjenje nezaposlenosti i osiguravanje kadrova za poslodavce, istaknuto je na sjednici.

Poslodavci su također napomenuli da je, kao kontinuirana rješenja, potrebno izmijeniti postojeći obrazovni sistem, uvesti dualno obrazovanje, donijeti novi zakon kako bi se povećala primanja radnika i osigurati plansku prekvalifikaciju.

Nova članica Grupacije poslodavaca ZDK pri UPFBiH - Sun Pack d.o.o. Tešanj



Sun Pack d.o.o Tešanj je firma osnovana na bazi dugogodišnjeg iskustva u području poslovanja sa ambalažom i mašinama za pakovanje u prehrambenoj industriji.

Firma se bavi ambalažom za pakovanje svih vrsta hrane odnosno prehrambenih proizvoda, kao što je meso i prerađevine od mesa, mlijeko i prerađevine od mlijeka, pekarski i konditorski proizvodi, kolači, peciva, voće, povrće i ostalo.

Materijali koje koriste za ambalažu prilagođeni su vrstama hrane koja se u njih pakuje te posebnim zahtjevima kupaca koji žele da njihov proizvod bude prepoznatljiv na tržištu.

Obzirom da firma prati i tehnološke inovacije i napretke u sferi pakovanja u Europi i svijetu u mogućnosti su odgovoriti svim posebnim zahtjevima i potrebama kupaca, što se tiče očuvanja svježine, dugotrajnosti, produžetka roka trajanja, dizajna, izgleda, funkcionalnosti i sl.

Poslovanje se bazira na fleksibilnom odnosu sa kupcima, u smislu isporuke robe na traženu adresu.

Više o kompaniji pogledajte na [njihovoj web stranici](#).

Nova članica Grupacije poslodavaca ZDK pri UPFBiH - Inter d.o.o. Tešanj

Društvo Inter d.o.o. Tešanj osnovano je 1990. godine kao "Inter" Matuzići Doboj jug. Pod nazivom "Inter" d.o.o. Tešanj društvo posluje od 25.09.2012. godine jer je izvršilo promjenu naziva i sjedišta društva.



Vlasnik društva je Muharem Ahmić sa udjelom 100% u vlasništvu, a direktor društva je Dino Ahmić. Osnovna djelatnost društva je građevinarstvo - visokogradnja. Pored visokogradnje društvo obavlja i druge prateće djelatnosti u građevinarstvu kao što su: projektovanje i tehničko savjetovanje, proizvodnja, transport i ugradnja svih vrsta betona, proizvodnja, transport i ugradnja ALU i PVC stolarije, veleprodaja i maloprodaja građevinskog materijala, veleprodaja i maloprodaja autodijelova iz putničkog i traktorskog programa, te usluge transporta u zemlji i inostranstvu.

Društvo upošljava 50 stalno zaposlenih radnika raznih struka i zanimanja sa tendencijom stalnog rasta. Struktura zadovoljava potrebe društva tako da danas upošljava visokoobrazovan stručni kadar tehničkog smjera, ekonomskog, pravnog i dr. kao i proizvodne radnike koji su u direktnom procesu proizvodnje.

U proteklim godinama društvo je uspješno izgradilo veliki broj objekata raznih vrsta i namjena na prostoru Bosne i Hercegovine. Izgrađeni objekti su stambenog, poslovnog, proizvodnog i sportskog karaktera. Pored toga izgrađen je veliki broj stanova i poslovnih prostora za tržište, veliki broj objekata infrastrukture (bazeni za vodu, vodovodi, kanalizacija, postrojenja za tretman voda itd.) objekata vjerskog karaktera, objekata humanitarnog karaktera (obnova ratom porušenih kuća) te niz drugih objekata. Društvo je opremljeno sa svom potrebnom opremom i mehanizacijom za izvođenje radova. Posjeduje vlastitu betonaru za proizvodnju svih vrsta betona. Pored betonare posjeduje i vlastiti pogon za proizvodnju ALU i PVC stolarije, te veliki broj transportnih sredstava raznih vrsta i namjena.

Više o kompaniji pročitajte na [njihovoj web stranici](#).

Preminuo Mirko Grbešić, dugogodišnji član UPFBiH



Dugogodišnji član Udruženja poslodavaca FBiH, bh. poduzetnik Mirko Grbešić preminuo je u utorak u 62. godini života nakon teške bolesti. Grbešić je bio vlasnik Mepasa, Brodomerkura, Saponije, Koestlina, prodajnog centra SMT itd.

Svoj poslovni uspjeh počeo je s trgovinom, a 1989. godine osnovao je kompaniju Mepas d.o.o. koja je ubrzo postala jedna od najjačih u toj branši u Hercegovini. Potom se počeo baviti uvozom i distribucijom hrvatskih i stranih brendova u Bosni i Hercegovini. 1995. dovršena je zgrada Mepasa s velikim skladišnim prostorom u Širokom Brijegu, nakon čega se kompanija širi. Skladišni prostori osigurani su i u Sarajevu, Tuzli te Banjoj Luci.

1998. je kupio osječku Saponiju, a nakon toga je postao vlasnik bjelovarskog Koestlina. 2000. godine Mepas otkupljuje i kompaniju metalne proizvodnje i ugradnje Metalac iz Širokog Brijega. Grbešić je također postao vlasnikom Maraske (kasnije prodane Stanić grupi) i Brodomerkura. 2012. je u Mostaru otvorio najveći trgovački centar u Bosni i Hercegovini koji se prostire na skoro 100 hiljada kvadratnih metara a nosi naziv Mepas Mall. Centar je građen na način da vizualno, koncepciji i sadržajno prati sve aktualne trendove kada su u pitanju centri ovog tipa u Europi.

Bio je poznat i kao veliki prijatelj sportskih klubova u Širokom Brijegu te kao osoba koja rado učestvuje u humanitarnim akcijama.



UDRUŽENJE POSLODAVACA

UDRUŽENJE POSLODAVACA FBiH
MARŠALA TITA 6, 71 000 SARAJEVO

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba